

Wakita na a puwetaa YAKUBA

Ga use á Yakuba

¹ Wakita na yá aṅkwa puwaná ba iya Yakuba, waladí á Dadaamiya antara Yaakadada Yaisu *Almasiihu, yá aṅkwa á puwakurte wakita na, yá gaktur use ge kure bademme á emnde a Dadaamiya na kyarakuraakya á dem duniya bademme na.

Njá á emnde a fetarfe má shatersha zladá

² Egdzar mama-aha-aaruwa, ma a shakuraa am sarte-ara zladá keni, higauhiga an ervaunđe á kure bademme. ³ Adaba ba kure keni diyakur-diya, ganakini máki tsakuraatse dzaṅdzaṅe, ke-zlakuranveka fetarfire á kure am sarte ṅanna wá, kure kwá gevá emnde a farvaunđe an tsáká ire. ⁴ Amá tsawatse ba ṅga. A marápsemare farvaunđe á kure am duksa bademme. Estuwa kwá de gevá emnde na baaka duksa mándzawe áte itare, hyairephye am duksa bademme. Á de ektsakurarka jirire keni am duksa bademme.

⁵ Má aṅkwa ura am dagave á kure diyaaka názena á maganá ṅane, a enndava enkale áza Dadaamiya. Dadaamiya á de vanteva. Adaba Dadaamiya á kwalarka ge edda una á ndava enkale ázenara, á vanteva ma vaatara keni. Adaba ṅane wá, bárbare ge vaterte duksa ge emnde bademme. ⁶ Amá má ura á ndava duksa áza Dadaamiya wá, a fetarfe geni Dadaamiya

á de vanteva. A manka shaige am ervaunċe. Adaba edda una á maga shaige am ervaunċe wá, ñane ba seke njá á haye na á weshaná effeya, á dáná á dehuwa, á sehuna, á dem dalbe-aha bademme. ⁷ Ura estuwa, a sleka am ervaunċe-aara ganakini á de shansha názena á ndavaná ñane áza Yaakadada. ⁸ Adaba gevge an ire bubuwa, tsanaaka ire-aara am tate palle.

Elva arge berba-aha antara talage-aha

⁹ Ura talage, má fetarfe áte Yaisu *Almasiihu wá, a ehgiga an ervaunċe-aara bademme. Adaba kanteka Dadaamiya. ¹⁰ Ge sleberba na fetarfe áte Yaisu Almasiihu keni maa, ñane keni a ehgiga an ervaunċe-aara bademme, arge una ni a genaahge ge Dadaamiya na. Adaba diyaadiya ñane ganakini á de zla shifa-aara, ba seke mága ugbene á mása am fe, má á geda, á geda á ba áte watsewatsire. ¹¹ Má mberatembera vaciya an kárá-aara, á badza zariyire-aara, á geda á dem áhá, mása keni á emtsa bademme. Ba duksa palle ge sleberba keni. Á ba am sarte na ñane á shunċula ge mága slera-aha-aara na wá, a naba icanmica emtsa.

Elva a mbedá á dem haypa antara zlaċa

¹² Watse geċa yaikke ge edda una tsaatse ba shagera am zlaċa-aha gergere. Adaba má tsaatse shagera mbedáaaka wá, á de shansha laċa-aara. Amaana: á de shá shifa na á zleka, a ba Dadaamiya, á de vaterte ge emnde na wayarwaya an ñane na. ¹³ Amá má á kátá mbedá edda-aara wá, a banka ni a maganaa ba Dadaamiya. Adaba ura á dzegwánka mbedá

Dadaamiya. Dadaamiya keni á mbedeka ura ðekideki. ¹⁴ Ba emtaŋkire na á dzamaná ura am ervaunðe-aara na wá, á mbedaná ba una ŋanna á dem haypa. ¹⁵ Duksa shagerka na á dzamaná ura am ervaunðe-aara, am iga-aara cekwaŋgudi á maganá á ba áte parakkire. Daaci má waltewa haypa, á saná emtsa.

¹⁶ Daaci a kefarakuraaka emnde, egdzar mama-aha-aaruwa. ¹⁷ Názena á sáwá áza Dadaamiya wá, baðemme ba shagera, baaka una laake am huðe-aara. Baðemme á názena á já lámbe á ura wá, á sáwá á ba áza Dadaamiya na a nderaa parakkire-aha am samaya na. Adaba Dadaamiya, ŋane a eptsaveka, á zláleka seke náza vaciya geni á yakurya am tabeðammire. ¹⁸ A wayetaa ba ervaunðe-aara ge vamite shifa na á zleka na, a vamite an elva-aara na elva a jirire na, geni mí gevge ma emnde zuŋŋwa ba miya am ice-aara am názena a nderanaa ŋane baðemme.

Cenaucena elva á Dadaamiya, fawansaarfe

¹⁹ Egdzar mama-aha-aaruwa, faufa hyema ge cena názena yá bakurná ya na: Ma ware keni a eccena názena ni tá banna emnde. A gevka slewatsewatse am elva, a gevka slervaunðe. ²⁰ Adaba slervaunðe wá, á taa maganaaka názena á kataná Dadaamiya. ²¹ Adaba una ŋanna, tara danŋwire antara mándzawire na am ervaunðe á kure na wá, yawanya baðemme, gawanaaga ire á kure á katafke á Dadaamiya. Ma uwe keni magaumaága á ba áte elva-aara na

aṅkwa am kure na, aɗaba elva-aara ṅanna wá, á dzegwándzegwa lyakurlya.

²² Cenausena elva á Dadaamiya, kwá ámbera maga názena á bakurná ṅane. Edda una ba a cenvaahe an hyema, amá á maṅka názena á ndahaná Dadaamiya wá, á keɗa ba ire-aara.

²³ Edda una ba a cenvaahe an hyema, amá á maṅka názena á ndahaná Dadaamiya na wá, ṅane á garáva an edda una á zhára ice am kweteram.

²⁴ Ba a zharaa wafke-aara, cek-waangudi am iga á una ṅanna wá, kerten a viyanaaviya njá á wafke-aara.

²⁵ Amá edda una a cenea shairiya á Dadaamiya, a maganaahe an uṅjule-aara maa, Dadaamiya á gá barka áte ṅane am slera-aha-aara baɗemme. Aɗaba ṅane cenaaka shairiya á Dadaamiya á ba an hyema kerten a viyanaahe na, amá a fansaarfe. Aɗaba shairiya á Dadaamiya ṅanna wá, baaka duksa mándzawe am huɗe-aara. An hakuma jipu ge samise am haypa.

²⁶ Má ura á zhára ire-aara ganakini ṅane slenadina, amá á taa ṅanaaka nara-aara, daaci ṅane wá, á keɗá ire-aara, ɗaba nadina-aara ba dey.

²⁷ Daba nadina á jirire na cuɗeɗe, á kataná Eddemiya Dadaamiya wá, fanu hyema ge egdzar tahe-aha, antara wegyegwar ṅwasha na tá am laruwa, ira á mága eṅkale áte ire-aara ba ge ṅane keni, geni a demka am slakwatsa na tá maganá emnde a duniya na.

2

Bademme á emnde ta ba kalkale áza

Dadaamiya

¹ Egdzar mama-aha-aaruwa, ekkure wá, fakur-taarfe áte Yaakadada Yaisu *Almasiihu na baaka seke nane an daradza na. Afaba una nanna, eggrauka emnde dekideki. ² Ba seke má daremda emnde buwa á dem jahava á kure á katafke á Dadaamiya, palle-aatare sleberba am zane zariya, amá palle nane talage am emgyegwe a zane, ³ daaci kwá belanu ice ge zhel na am zane zariya na, kwá de yainu an use, kwá baná: Nawa njinja am kurshi na ambarkana; amá ge talage wá, kwá baná: Sawá njinja am áhá am sera-aaruwa áhuna. ⁴ Má kwá maga una, magakurnaaka gergerire am dagave á emnde emtu? Kwa epsawaa palle, una nanna kwa slanaa ba kure, amá sawari á kure nanna shagerka.

⁵ Egdzar mama-aha-aaruwa, cenaucena ba shagera. Diyakurka emtu geni Dadaamiya a dzerse talage-aha am duniya na, geni tá fetarfe áte Yaisu *Almasiihu, ta gevge emnde a berba am ervaunfe-aatare? Nane a dzeraterse geni tá shansha yaikkire na a ba nane, á de vaterte ge emnde na wayarwáyá an nane. ⁶ Amá kure, kwá perdá talage-aha. Ábi ba emnde a berba una tá magakurá palasa, tá dakurá á de katafke á shairiya? ⁷ Zlabe ádaliye, ábi ba itare una tá zlazla zhera á Ura yaikke na kwá dabaná kure?

⁸ Máki dabakurtedaba shairiya á Dadaamiya áte una an puwa am wakita-aara, a ba nane: Ewwaya sleriya á na ba seke ire á na na wá, kwa magaa duksa shagera. Afaba shairiya-

aara ɲanna wá, baaka seke ɲane. ⁹ Amá má kwá maga gergerire am dagave á emnde wá, kwá mága haypa. Ɗakuraanja Dadaamiya an shairiya. Adaba fakuransaarka ge shairiya-aara. ¹⁰ Ma ura a dɔbete shairiya-aha á Dadaamiya bademme keni, máki a yaa palle, bademme á umele-aha na keni ba seke dɔbaaka. ¹¹ Adaba a ba Dadaamiya: Manƙa gwardzire. Ba Dadaamiya ɲanna zɓabe adaliye una a ba ɲane: Jeka shifa. Daaci ma maganƙa ba gwardzire keni, máki ka de jaa shifa, ba fakansaarka ge shairiya-aara. ¹² Adaba una ɲanna yá bakurá ba jirire: Bademme á názena kwá ndahaná kure, antara una kwá maganá kure, diyawed-diye ganakini Dadaamiya á de kya shairiya-aara bademme, á de zhára má fakuransarfe ge shairiya-aara na a samisaa ɲane am haypa na. ¹³ Ma ware una á zanvaarka ge emnde, vaci shairiya wá, Dadaamiya á de zanvaarka ge ɲane keni. Amá má á zanvarze ge emnde wá, ɲane keni á de mbedfeka vaci shairiya.

Mága slera á Yaisu a zɓáláwa an fetarfire áte ɲane

¹⁴ Má banba edda-aara ganakini ɲane fetarfe áte Dadaamiya, amá á manƙa názena á ndahaná Dadaamiya, ázara námpire-aara? Jeba á fetarfire ɲanna á sanánka shifa na á zleka na. ¹⁵ Ba seke má sámsá slefetarfe ásezekure, ma zhele ma mukse, má baaka kacekaca-aara, baaka náza za-aara, ¹⁶ daaci kwá baná: Á jamima shifa, a vakteva Dadaamiya kacekaca antara dɔfafa, amá ba uwe keni kwá vanteka, una ɲanna

ngulme ge uwe? ¹⁷ Ba duksa palle ge fetarfire áte Dadaamiya. Má bánba edda-aara á dɓaba Dadaamiya, amá á maŋka názena á ndahaná Dadaamiya, fetarfire-aara ba dey.

¹⁸ Má bánba edda-aara ɲane wá, á fetarfe, amá iya yá maga ba slera á maggwire wá, náwa názena yá banná ya: A ndindaha, á fetaare estara áte Dadaamiya, amá á maŋka slera á maggwire? Lauktu iya keni yá ndandáhá slera á maggwire-aaruwa, á diyisediye ganakini ya ura á Dadaamiya á ba an jirire. ¹⁹ Ábi diyakdiya ganakini baaka Dadaamiya umele, sey ba palle. Máki estuwa wá, shagera kwaye! Amá ba jini-aha keni diyardiya una ɲanna. Adɓaba una tá an lyawa-aara jipu. ²⁰ Amá ekka wá, degdege ire á ɲa! Wayanwáyá ka diyeddiye geni má ká dɓaba Dadaamiya, amá ká maŋka slera á maggwire wá, dɓaba Dadaamiya á ɲa ba dey? ²¹ Yehauteyeha eggyemiya Ibrahimia. ɲane a gev estara sledzayya ervaunɗe á katafke á Dadaamiya? Ábi a gev sledzayya ervaunɗe á katafke á Dadaamiya an slera na a maganaa ɲane, a eksevaa Isiyaaku egdzar a huɗe-aara ba ge ɲane, á kátá icaná sadake-aara ge Dadaamiya. ²² Ká aŋkwa nanna emtu mazla-aara ganakini fetarfe Ibrahimia, fetarfire-aara a zlááwa á ba antara slera-aara ɲanna? Fetarfire-aara hyephye adɓaba slera-aara ɲanna. ²³ A maganaahe á ba áte una a ndahanaa wakita á Dadaamiya, a ba ɲane: Ibrahimia a fetaare áte Dadaamiya. Adɓaba una ɲanna a gev sledzayya ervaunɗe á katafke á Dadaamiya. Ibrahimia a gev slakate

á Dadaamiya. ²⁴ Daaci ká aṅkwa nanna emtu mazla-aara ganakini ura á shá dzayyire á ervaunḡe áza Dadaamiya an slera-aara, baaka ni ba a fetaare áte ṅane zlauzle?

²⁵ Yehauteyeha zlaḡe ádaliye zaware umele zhera-aara Rahab, ṅane keni a shán ba estuwa dzayyire á ervaunḡe-aara. Am sarte na daremda emnde a *Iserayiila á dem mba-aara, a kwarater-saa ṅane unṅule geni tá enzlesenḡle an ṅane. Adaba a magaa una ṅanna, a shaa dzayyire á ervaunḡe áza Dadaamiya. ²⁶ Ba seke una ni má dedde shifa am ura, edda-aara á emtsa na wá, fetarfire keni ba estuwa. Má edda-aara á maṅka slera á magwire, baaka shifa am fetarfire-aara.

3

Nara á urimagwe wá, ba kalkale antara kára

¹ Ya ndaa ba kure egdzar mama-aha-aaruwa, tatayauka gev malum-aha baḡemme á kure, amá dzamaudzámá emtsaḡe. Adaba ṅere ṅa emnde a kwaraterse wakita á Dadaamiya ge emnde wá, shairiya á ṅere á de jauje ge náza á emnde. ² Baḡemmire á miya mí maga ba haypa am duksa baḡemme. Má ura maganaaka haypa am ndaha elva wá, edda-aara baaka slejirire arge ṅane. ṅane á dzegwándzegwa ṅá vuwa-aara am duksa baḡemme. ³ Zharauzhára áte belsa, mí puw-terem lidza am mbuwe ge belsa-aha wá, geni a faramisaarfe. Ba jirire tá ḡaba ba tate na mí kataná miya. ⁴ Zlaḡe ádaliye, zharauzhára áte paare á yawe. Paare á yawe wá, yaikke vayvaya. Amá náza ebbáká-aara wá, ba cekwaanḡuḡi.

Una ma a tsetaa valale keni, slebaka paare nanna á tsanmaare á ba an nane. ⁵ Ba duksa palle ge nara á urimagwe. Má ge jirire wá, nane ba egdza duksa cekwaanḡudí am mbuwe. Amá an hakuma jipu. Zharauzhára huđe á kaamba, antara baakire á zlakta-aara, amá á nezlarka ge egdza nara á kára ba cekwaanḡudí. ⁶ Nara á urimagwe keni ba kalkale antara kára. Adaba bademme á mandzawire na am huđe á duniya na anḡwa am nane. Nara wá, á badzámiya ba nane am njá á miya bademme. Á mbáná ba nane kára ge badza shifa á ura bademme. Kára nanna keni tá an dzágwáva an kára á jahanama.

⁷ Emnde tá dzegwándzegwa kwára duksa bademme. Tá dzegwándzegwa kwára dabba-aha, antara yiye-aha, antara bademme á názena á hulmba am haha, ira názu am yawe keni bademme. ⁸ Amá tá taa kwaruka nara đekideki. Nara wá, mándzawe jipu, á njeka tsekadđe đekideki. Kwakya wenye-aara á shekwaaka ja shifa. ⁹ Njá gálá Eddemiya Dadaamiya an nane, njá zlazla emnde na a nderateraa nane áte zati-aara keni á ba an nara nanna zlađe. ¹⁰ Ba ura palle, á gálá Dadaamiya á ba an we-aara; á ba an we nanna zlađe ádaliye wá, á zlazla emnde an nane. Egdzar mama-aha-aaruwa, magaumika una nanna. ¹¹ Anḡwa suwa ni tá ká yawe shagera am huđe-aara, ádaliye á segashe yawe đanđanə emtu? ¹² Egdzar mama-aha-aaruwa, anḡwa nabugda ni á ya anyaranyara emtu? Emtu anḡwa anyaranyara na á ya nabugda emtu? Baaka đekideki. Ba duksa palle an

suwa. Baaka suwa yawe-aara danɗaɗe, ádaliye á segashe yawe á shá am huɗe-aara.

Enkale na á sáwá áza Dadaamiya

¹³ Ankwa slenkale an ilmu jipu am dagave á kure emtu? A marsemare edda-aara zláwá shagera an ga ire am zláwá-aara, lauktu tá de diyeddiye emnde ganakini nane slenkale.

¹⁴ Amá má kwá shelha áte emnde, kwá maga danɗwire á ervaunɗe, duksa baɗemme kwá wayanánta ba ge ire á kure wá, galauka ire ba dey geni kwa emnde a enkale. Eptsawanaaka iga ge jirire. ¹⁵ Jeba á enkale nanna wá, saaka á sawa áza Dadaamiya, a sawa áza Shaitaine. Ta jansare ba emndimagwaha. Ba názá á duniya.

¹⁶ Adaba am tate na tá shelha emnde, ma ware keni á wayanánte duksa ba ge ire-aara wá, duksa baɗemme á zláwáveka an unɗule-aara. Daaci baɗemme á shagerkire á ba am tate nanna.

¹⁷ Amá enkale na á vatertá Dadaamiya ge emnde wá, gergere an una nanna. Edda una shansha jeba á enkale nanna wá, nane cuɗeɗe á katafke á Dadaamiya. Nane gevge slemela emnde, slekemaare, slezevarze. Nane a eggerka emnde, ervaunɗe-aara ba palle áte emnde baɗemme. Baɗemme á názena á maganá nane an nampire jipu. ¹⁸ Emnde na ni tá ankwa á maga slera á mela emnde geni itare keni a sharánsha hairire wá, slera-aatare an nampire jipu, itare tá sha dzayyire á ervaunɗe áza Dadaamiya.

4

Kumauka njá á emnde a duniya

¹ Labara anƙwa gajawe antara dagala am dagave á kure? Baaka hairire am dagave á kure adaba kwakya wáyá á duksa á kure. ² Kwá maga wáyá á duksa, amá kwá shanka. An una nanna wá, kwá já shifa. Kwá kumá duksa. Duksa nanna keni kwá shanka tsa. Adaba ba una nanna anƙwa gajawe antara dágala am dagave á kure. Adaba uwe kwá shánká názena kwá kataná kure, adaba nalakurka áza Dadaamiya. ³ Ma kwá nalaná á ba áza Dadaamiya keni, kwá shánka, adaba kwá nalaná áte unjule-aareka. Adaba kure, kwá katán ba ge emtakire á duniya. ⁴ Kure, eptsakurantepts a elva áte Dadaamiya á kure. Adaba ba jirire diyakurdiya ganakini má ura wayaawáyá an emtakire á duniya, nane gevge kelaade á Dadaamiya. Ura má a eksese emtakire á duniya wá, nane a eksese gev kelaade á Dadaamiya. ⁵ Gawanveka názena a ndahanaa wakita á Dadaamiya na ba dey. Adaba a ba nane: Dadaamiya á shelha jipu áte shifa-aara na a femaa nane am miya na, geni á njá á ba átuge nane palle. ⁶ Diyaweddiye zlaɓe adaliye geni Dadaamiya a magamiyaa ngurna yaikke geni mí dzegwándzegwa dába ba nane palle. Adaba anƙwa puwartepuwa am wakita-aara, a ba nane: Dadaamiya á nwateraareka ge emnde á mága kurávire, á magaterá ngurna ba ge emnde na garnaaga ire-aatare. ⁷ Adaba una nanna, fawansarfe ge Dadaamiya, tsawatse ba shagera á katafke á Shaitaine, á de zhagade ba

ɲane átuge kure. ⁸ Gawáptege á sem sera á Dadaamiya, ɲane keni á de gakuraptege. Kure emnde a mága haypa, sawansese erva á kure mazla-aara. Kure emnde na kwá an dzama ire bubuwa keni, dabaudfába ba Dadaamiya palle. ⁹ Dzamaudzámá ire, kyuwaukyuwa, kyuwaukyuwa á ba an yawe á kyuwa adaba haypa-aha na kwa maganaa kure. Dzaka á kure a gevge dákwa, higa á kure keni a gevge dzámá ire. ¹⁰ Gawanaaga ire á kure á katafke á Yaakadada, ɲane á de tsakurmartse.

Badzauka zhera á sleriya á kure

¹¹ Egdzar mama-aha-aaruwa, badzauka zhera á emnde. Edda una á badza zhera á sleriya-aara, bi á epsawanaahe wá, a epsawanaahe, á badzanve ba shairiya á Dadaamiya na a ba ɲane: Ewwaya sleriya á ɲa ba seke ire á ɲa. Daaci má ká badza shairiya á Dadaamiya wá, ká daban geni ká fansarfeka, amá ká epsawepsawa. ¹² Sey ba Dadaamiya palle una slevaterterte shairiya-aara ge emnde, ba ɲane palle una sleshairiya. Daaci ba ɲane palle una an hákuma ge lya emnde, bi ge kefateraakedfa. Amá ekka, ka kuran ka ware, geni ká epsawa emnde umele?

Magauka kuravire

¹³ Cenawivaacena emtsaade, kure emnde na kwa bantsa: Ma vatena, ma makuralla keni, ɲá zlálá á dem berni yaikke, ɲá de ga sakan-deri palle am tsakala áhuwa, ɲá sheta shungu kwakya na. ¹⁴ Kure emnde na kwa slaa una ɲanna, diyakurdiya názena á de magava makuralla emtu? Adaba shifa á kure ba seke mágá

á yire á kara. Ká ezzhárá á tsetse, amá kerten zadevzade. ¹⁵ Arge una ɲanna, ma andze kwá ba: Má wayetewayá Dadaamiya daada shifa wá, watse ɲá de maga tara una antara una. ¹⁶ Amá kure, kwá kuráva ba dey am elva. Kuráva á kure ɲanna wá, shagerka. ¹⁷ Diyaweddiye ganakini má edda-aara diyaadiya názena ma andze á maganá ɲane, amá magaaka, ɲane guge haypa.

5

¹ Ekkure emnde a berba, cenawivaacena, náwa yá bakurá elva: Kyuwaukyuwa, kyuwaukyuwa á ba an yawe á kyuwa. Adaba kwakya zlaɗa na kwá de shaná kure. ² Baɗemme á nalmane á kure na watse á badza. Dikele á zane-aha á kure na keni, á de zuze tarare baɗemme. ³ Dindar á kure, antara lipela á kure baɗemme á de zaná ba haha. Una ɲanna watse seydire mándzawe áte kure. Ba irice á kure keni kwá de badza ba estuwa ba seke a zakuraa ba kára. Amá kure, kwá far ba jahaná nalmane ge ire á kure. Diyakurka ganakini herzhe á zla duniya ɲanna emtu? ⁴ Kwa zlermu emnde geni tá de magakurá slera am fe, tá de halakurá duksa ba ge kure á sem mba, amá zakuruze mbera-aatare. Diyaweddiye ganakini tá aɲkwa kyuwa emnde ɲanna á katafke á Dadaamiya geni á cenatervaare labare. Dadaamiya na sleksa ba ɲane cenáncena kyuwa-aatare baɗemme. ⁵ Zakuruze emtakire á duniya na, kwá aɲkwa maga ba názena á kataná ire á kure, kwá aɲkwa ezza, kwá aɲkwa essha ba seke tá de

herakurherá. ⁶ Iyau, emnde na baaka haypa-aatare keni, kwa puwateraa ba kure á dem shairiya, haa kwa cebaa shifa-aatare, amá itare magarka gajawe d'ekid'eki.

Faufa ervaunḡe; magaumága maduwa

⁷ Daaci egdzar mama-aha-aaruwa, kure wá, faufa ervaunḡe dem sarte á eptsa á Yaakadada Yaisu *Almasiihu. Zharauzhára áte sleherḡa. Emtsaadé wá, á páká madare, á fa ba ervaunḡe dem slakslakire, lauktu á shansha nampire á fe-aara. ⁸ Kure keni faufa ervaunḡe ba estuwa. Tsawatse ba shagera, adaba herzhe sawa á Yaakadada.

⁹ Cenausena ba shagera egdzar mama-aha-aaruwa: Magauka mauniyire am dagave á kure, daaci Dadaamiya á de ḡakurka an shairiya. Náwa sleshairiya am niya-aara herzhe á sawa.

¹⁰ Yehauteyeha njá á nabi-aha á Dadaamiya werre, zladá na ta shanaa itare, an farvaunḡe-aatare. Kure keni d'abaud'aba á ba áte una ḡanna. ¹¹ Miya wá, má zharater tá á ba am gedá-aatare, adaba dzegwarándzegwa ebbasha-aara. Cenakuráncena labare á Ayuba werre emtu? Ervaunḡe na a fanaa ḡane am zladá-aha-aara, an barka na a garaa Dadaamiya am iga á una ḡanna keni, diyakurdiya bademme. Ba jirire Dadaamiya wá, slezevarze, slemagatera ḡurna ge emnde.

¹² Egdzar mama-aha-aaruwa, náwa názena á jauje ge duksa bademme: Zauka wadá, ma an Dadaamiya, ma an haha, ma an jebara keni d'ekid'eki. Máki eksakuraarekse elva ḡanna, bawanba: Ane. Máki eksakuraarka wá,

bawanba: A'aa. Dadaamiya keni á de ñakurka an shairiya.

¹³ Anƙwa ura am dagave á kure am zlaɗa emtu? A enɗala Dadaamiya. Anƙwa ura am dagave á kure am geɗa emtu? A eggala Dadaamiya an lahe. ¹⁴ Anƙwa ura lapika am dagave á kure emtu? A eɗɗaha male-aha á aiklaisiya, tá de magar maduwa, tá de ganve waye an zhera á Yaakadada Yaisu. ¹⁵ Máki emnde ɗanna fartarfe, magarka shaige am názena tá ɗalaná itare, Yaakadada keni á melanumele ge edda una lapika na, á tsantetse. Ma anƙwa haypa na a guwaa ɗane keni, á yanarye. ¹⁶ Aɗaba una ɗanna, shebauka haypa, ndaundáhá názu am erwaunɗe á kure am dagave á kure. Magaumága maduwa am dagave á kure, ma ware keni a emmága maduwa arge ura, geni kwá mbembe. Maduwa á edda una ni an bárá erwaunɗe-aara wá, an hakuma jipu á maga slera kwakya. ¹⁷ Yehauteyeha nabi *Ailiya werre. ɗane keni urimagwe ba seke miya, a ɗala Dadaamiya an erwaunɗe-aara palle geni a hyeka yawe. Daga ba vacite ɗanna dem sakanderi keye an kyalma, hyaaka yawe ɗekideki am larde ɗanna. ¹⁸ Am iga á una ɗanna maa, a magaa maduwa geni a sawa yawe á zhegela, Dadaamiya a fantau ge hya yawe zlaɓe áɗaliye, lauktu duksa baɗemme a fantau ge segashe am haha.

¹⁹ Egdzar mama-aha-aaruwa, máki mbeɗaambeɗa palle á kure áte barama á Dadaamiya, duwa á ura umele am kure a de tsantehe wá, a magaa duksa shagera jipu.

²⁰ Diyaweddiye ba shagera ganakini má edda-aara a tsante ura mbedaambeda áte barama á Dadaamiya ɲanna wá, a ɲezlese am emtsa. Ma a kwakyevaa estara haypa á edda-aara keni, Dadaamiya á yanarye bademme.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d